



**REPUBLIKA E SHQIPËRISË
AUTORITETI I KONKURENCËS**

RREGULLORE

**PËR ZBATIMIN E PROCEDURAVE TË PËRQENDRIMIT TË
NDËRMARRJEVE**

**KREU I
DISPOZITA TË PËRGJITHËSHME**

**Neni 1
Objekti**

Kjo rregullore ka për objekt zbatimin e procedurave për kontrollin e përqendrimeve të ndërmarrjeve, në përputhje me Ligjin Nr. 9121, datë 28.7.2003 “Për Mbrojtjen e Konkurrencës” (i ndryshuar).

**Neni 2
Fusha e zbatimit**

Kjo rregullore zbatohet për të gjitha përqendrimet në formën e bashkimeve juridike dhe faktike të dy ose më shumë ndërmarrjeve, përfundimisht të kontrollit mbi një ose më shumë ndërmarrje, krijimit të një ndërmarrjeje të përbashkët, të përcaktuara në nenin 10 dhe që plotësojnë kushtet e nenit 12, pika 1 të Ligjit.

**Neni 3
Përkufizime**

Në këtë rregullore, termat e mëposhtme kanë këto kuptime:

1. “Ligj” nënkuptohet Ligji nr 9121, datë 28.07.2003 “Për Mbrojtjen e Konkurrencës” (i ndryshuar).
2. “Ditë Pune” do të thotë të gjitha ditët përveç të Shtunës, të Dielës, dhe festave zyrtare
3. “Pala ose palët në përqendrim” i referohet si palës blerëse ashtu edhe palës të blerë, ose palëve që bashkohen, ose palës subjekt i një oferte publike.

Neni 4 Barra e Provës

Pala që paraqet njoftimin për përqendrim është e detyruar që të paraqesë përpara Autoritetit të gjitha të dhënat dhe provat e nevojshme mbi të cilat mbështet pretendimet e saj.

Neni 5 Vlerësimi i përqendrimeve

1. Për vlerësimin e përqendrimeve Komisioni mban parasysh nevojën për të mbrojtur dhe zhvilluar konkurrencën e lirë dhe efektive në treg, duke pasur parasysh strukturën e këtij tregu dhe konkurrencën aktuale ose potenciale të ndërmarrjeve që veprojnë në këtë treg.
2. Komisioni, në përputhje me nenin 56 të Ligjit, autorizon përqendrimin që nuk kufizon ndjeshëm konkurrencën efektive, në veçanti si rezultat i krijimit ose forcimit të një pozicioni dominues, në tregun e brendshëm ose në një pjesë të ndjeshme të tij.
3. Komisioni, në zbatim të nenit 13 të Ligjit, ndalon përqendrimin i cili kufizon në mënyrë të ndjeshme konkurrencën në treg ose në një pjesë të tij, si rezultat i krijimit ose forcimit të pozitës dominuese.

KREU II Njoftimet dhe dokumentacioni shoqërues

Neni 6 Konsultimet para njoftimit

1. Nëse ndërmarrjet shprehin interesin për të realizuar një marrëveshje e cila sjell krijimin e një përqendrimi, ato mund të informojnë dhe të konsultohen pranë Autoritetit të Konkurrencës.
2. Sekretari i Përgjithshëm, me marrjen në dijeni të përqendrimin të mundshëm, konsulton palët për procedurat e mëtejshme, duke kërkuar një informacion me shkrim.
3. Informacioni duhet të përmbajë të dhëna për palët pjesëmarrëse si:
 - a) emrin dhe adresën e ndërmarrjes;
 - b) natyrën e veprimtarisë ekonomike të ndërmarrjes;
 - c) emrin e personit të kontaktit apo përfaqësuesit të ndërmarrjes, adresën, numrin e telefonit/ faksit, postës elektronike;
 - d) Formën dhe objektin e transaksionit;

- e) të dhëna të plota financiare (xhirot) për të treguar që transaksioni i synuar përmbush ose jo kriteret e përcaktuara në nenin 12 të Ligjit.
4. Sekretariati mund të përjashtojë nga detyrimi për dhënien e ndonjë informacioni të veçantë atëherë kur ky informacion disponohet nga Autoriteti.
 5. Palët pjesëmarrëse informojnë Autoritetin në rast të mos realizimit të marrëveshjes ose njoftimit të ofertës publike.

Neni 7

Detyrimi për njoftimin e përqendrimit

Nëse palët kanë përfunduar një marrëveshje për bashkim, përfitim kontrolli, krijimin e një ndërmarrjeje të përbashkët, ose kanë publikuar një ofertë publike për blerje ose përfitim kontrolli, duhet ta njoftojnë atë pranë Autoritetit në zbatim të nenit 12 dhe 53, pika 2 të Ligjit.

Neni 8

Personat e autorizuar për paraqitjen e njoftimit

1. Njoftimet duhet të paraqiten nga ndërmarrjet pjesëmarrëse në një përqendrim, nga përfaqësues të tyre të pajisur me autorizimin përkatës, ose nga përfaqësuesit Ligjor të përfaqësuar me prokurë.
2. Në rastin e bashkimit apo përftimit të kontrollit, njoftimi kryhet nga blerësi, përftuesi i kontrollit dhe në rastin e publikimit të ofertës publike, nga ofertuesi.
3. Njoftimet e përbashkëta duhet të dorëzohen në një formë të vetme. Njoftimin mund të kryhet nga një përfaqësues i përbashkët, i cili është i pajisur me një prokurë, në të cilin përcaktohet e drejta e përfaqësimit për llogari të ndërmarrjeve pjesëmarrëse.
4. Palët njoftuese ose përfaqësuesit e tyre i japin Autoritetit një adresë për komunikim brenda territorit të Republikës së Shqipërisë, ku mund të dërgohet e gjithë korrespondenca.

Neni 9

Paraqitja e njoftimeve

1. Njoftimet duhet të plotësohen sipas kërkesave të Formularit për Njoftimin e Përqendrimit në Formën e Thjeshtuar sipas Udhëzimit përkatës të Autoritetit të Konkurrencës.

2. Sekretariati argumenton dhe vlerëson me shkrim nëse plotësohen kriteret për përdorimin e formularit të thjeshtuar të njoftimit të përqendrimit sipas Udhëzimit përkatës të Autoritetit të Konkurrencës. Në rast se këto kritere nuk përmbushen, i kërkon palëve përdorimin e formularit të plotë të njoftimit të përqendrimit.
3. Palët njoftuese ose përfaqësuesit e tyre në një dokument të veçantë duhet të përcaktojnë në mënyrë të qartë informacionet që ata konsiderojnë se përmbajnë sekrete biznesi.
4. Informacioni duhet të jetë i saktë dhe i plotë.

Neni 10

Dorëzimi i dokumentacionit

(Ndryshuar pika “1” me VKK nr. 577, datë 20.12.2018)

1. Një kopje origjinale ose të njehsuar me origjinalen të njoftimit dhe të dokumenteve bashkëlidhur (të përcaktuara në formularin e njoftimit), duhet të dorëzohen në Zyrën e Arkiv Protokollit të Autoritetit të Konkurrencës.
2. Njoftimi duhet të përmbajë një listë përshkimore të dokumentacionit bashkëlidhur si dhe numrin e faqeve përkatëse të tyre.
3. Nëse dokumentacioni përkatës është në gjuhë të huaj, pala njoftuese paraqet një kopje të shoqëruar me përkthimin në gjuhën shqipe e cila mban dhe vërtetimin noterial për saktësinë e këtij përkthimi.
4. Pranimi i njoftimit dhe i dokumenteve bashkëlidhur atij duhet bërë gjatë orarit zyrtar të punës, në adresën: Autoriteti i Konkurrencës, Rruga “Sami Frashëri” Nr 4, kati IV, Tiranë, Shqipëri.

Neni 11

Data kur njoftimi bëhet efektiv

1. Njoftimet bëhen efektive në datën kur ato dorëzohen në sektorin përgjegjës për mbajtjen e Arkivës e Protokollit të Autoritetit të Konkurrencës.
2. Sekretariati, bazuar në nenin 54 të Ligjit u konfirmon me shkrim ndërmarrjeve ose përfaqësuesve të tyre se njoftimi është i plotë ose jo. Në rast se njoftimi është i plotë, afati i parashikuar në nenin 56 të Ligjit fillon në ditën e punës pasardhëse të ditës së njoftimit me shkrim të ndërmarrjeve ose përfaqësuesve e tyre .
3. Nëse njoftimi nuk është i plotë, Sekretariati njofton palët njoftuese ose përfaqësuesit e tyre me shkrim dhe pa vonesë, duke caktuar një afat kohor,

jo më pak se 15 ditë pune, për plotësimin e informacionit. Në të tilla raste, afati i parashikuar në pikën 2 të këtij neni, fillon në datën në të cilën Autoriteti ka siguruar informacionin e plotë.

4. Sekretariati, në zbatim të nenit 55, pika 1 të Ligjit, mund të kërkojë të dhëna dhe dokumente të tjera shtesë nga palët njoftuese, përfaqësuesit e tyre, apo palë të treta të interesuara, në çdo kohë të procedurës së njoftimit brenda një afati të përcaktuar prej tij, të nevojshëm për vlerësimin e përqendrimit të njoftuar.
5. Palët njoftuese ose përfaqësuesit e tyre, për çdo ndryshim në informacionet dhe dokumentet bashkëlidhur njoftimit, për të cilat kanë apo mund të kenë dijeni, duhet të njoftojnë Autoritetin. Në të tilla raste, kur këto ndryshime mund të kenë një efekt të rëndësishëm në shqyrtimin e përqendrimit, afati i parashikuar në nenin 56 të Ligjit fillon në datën në të cilën Autoriteti ka marrë informacion mbi ndryshimet.
6. Informacioni jo i saktë, dhe i shtrembëruar konsiderohet si informacion jo i plotë në bazë të nenit 33 i Ligjit dhe përbën shkak për vendosje gjobe sipas nenit 73 të Ligjit.

KREU III

Shqyrtimi i njoftimit, fillimi i procedurave dhe afatet kohore

Neni 12

Informimi i Komisionit

Sekretariati informon me shkrim Komisionin për fillimin e procedurës së kontrollit të përqendrimit. Informacioni përmban datën e saktë të dorëzimit të njoftimit dhe dokumenteve të bashkëlidhura, llojin e formularit të njoftimit të plotësuar nga palët njoftuese apo përfaqësuesit e tyre, si dhe datën e konfirmimit të njoftimit.

Neni 13

Publikimi i procedurës paraprake

Sekretariati publikon fillimin e procedurës së kontrollit të përqendrimit në faqen zyrtare të internetit të Autoritetit të Konkurrencës www.caa.gov.al. Akti i publikimit përmban të dhënat për palët pjesëmarrëse, vendin e tyre të origjinës, formën e përqendrimit, sektorët e ekonomisë së përfshirë në të, ftesën e Autoritetit të Konkurrencës për shprehjen e komenteve nga palët e interesuara dhe afatin e fundit për shprehjen e këtyre komenteve.

Neni 14
Fillimi i afateve kohore

1. Afati 2 mujor për kryerjen e procedurës paraprake të përcaktuar në nenin 56 të Ligjit fillon ditën e punës pas ditës së konfirmimit të njoftimit.
2. Afati 3 mujor për kryerjen e procedurës së thelluar të përcaktuar në nenin 57 të Ligjit fillon ditën e punës pas datës kur Komisioni merr vendim për fillimin e procedurës së thelluar.

Neni 15
Përfundimi i afatit

1. Afati dy mujor për kryerjen e procedurës paraprake do të përfundojë me kalimin e asaj dite të muajit të dytë, që ka të njëjtën datë si dita që ka filluar afati. Kur ai muaj nuk e ka këtë datë atëherë afati do të mbarojë me kalimin e ditës së fundit të atij muaji.
2. Afati tre-mujor për kryerjen e procedurës së thelluar do të përfundojë me kalimin e ditës së muajit të tretë në vazhdim, që ka të njëjtën datë si dita që ka filluar afati. Kur ai muaj nuk e ka këtë datë atëherë afati do të mbarojë me kalimin e ditës së fundit të atij muaji.
3. Kur dita e fundit e një afati bie në ditë pushimi ose festë zyrtare, afati do të mbarojë në ditën e punës që vjen pas asaj të pushimit, ose festës zyrtare.

Neni 16
Festat zyrtare

Nëse afati, i llogaritur sipas nenit 14 të kësaj Rregullore, ka mbaruar dhe nëse festat zyrtare ose festat e tjera bien brenda periudhave të referuara në nenin 56 dhe 57 të Ligjit, një numër i njëjtë ditësh pune do t'iu shtohet këtyre periudhave.

Neni 17
Pezullimi i afatit kohor

1. Periudhat e referuara në nenin 57 të Ligjit do të pezullohen kur Komisioni, në bazë të nenit 33, pika 2 të Ligjit, duhet të marrë një vendim sepse:
 - a. Informacioni të cilin Sekretariati, në bazë të nenit 55 të Ligjit, e ka kërkuar nga njëra prej palëve njoftuese ose prej palëve të tjera të interesuara, nuk është dhënë ose nuk është dhënë i plotë brenda afatit kohor të përcaktuar prej tij;

- b. Një nga palët njoftuese ose palët e tjera të interesuara ka refuzuar dhënien e informacionit ose ka refuzuar bashkëpunimin me Sekretariatit për sigurimin e informacionit të kërkuar në bazë të nenit 55, që Sekretariati e konsideron të rëndësishëm;
- c. Palët njoftuese kanë dështuar në informimin e Autoritetit për ndryshimet e fakteve që përmban njoftimi.

2. Afatet e përcaktuara në nenin 57 të Ligjit do të pezullohen:

- a. në rastet e referuara në pikën 1 (a) dhe (b) të këtij neni, për periudhën ndërmjet fundit të afatit kohor të caktuar në kërkesën për informacion dhe marrjes së informacionit të plotë dhe të saktë të kërkuar me vendim të Komisionit;
 - b. në rastet e referuara në pikën 1 (c) të këtij neni, për periudhën ndërmjet ndryshimit të fakteve dhe marrjes së informacionit të saktë dhe të plotë të kërkuar me vendim të Komisionit.
3. Pezullimi i afatit kohor fillon në ditën pasardhëse të Vendimit përkatës të Komisionit. Pezullimi përfundon kur janë zhdukur pengesat që e kanë shkaktuar atë.

Neni 18 **Përputhshmëria me afatet kohore**

Afatet kohore të përcaktuara në nenet 56 dhe 57 të Ligjit do të konsiderohen të plotësuar nëse Komisioni i Konkurrencës ka marrë vendimin përkatës para përfundimit të këtyre afateve.

KREU IV **Procedurat për vendim-marrje**

Neni 19 **Palët që mund të dëgjojnë**

1. Përpara marrjes së një vendimi, në plotësimin e kushteve të neneve 56, pika 2 dhe 57 të Ligjit dhe në bazë të nenit 39 të Ligjit, Komisioni u krijon mundësi për tu dëgjuar palëve njoftuese dhe palëve të treta që lidhen me përqendrimin e njoftuar.
2. Përveç palëve të përcaktuara në nenin 8 pika 2 të kësaj rregulloreje, kanë të drejtën për t'u dëgjuar:
 - (a) palët e tjera të përfshira, përveç palëve njoftuese, të tilla si shitësi dhe ndërmarrja e cila është objekt i përqendrimit;
 - (b) palët e treta të interesuara, që mund të jenë personat fizikë ose juridikë, përfshirë konsumatorët, furnitorët, konkurrentët dhe veçanërisht anëtarët e organeve të administratës ose manaxheriale të ndërmarrjeve në fjalë ose përfaqësuesit e sindikatave të këtyre ndërmarrjeve.

- (c) palët ndaj të cilave Komisioni i Konkurrencës mendon të marrë një vendim në bazë të nenit 73, 74 dhe 76 të Ligjit.

Neni 20 **Seanca dëgjimore**

1. Komisioni u krijon mundësi palëve njoftuese dhe palëve të interesuara që të paraqesin verbalisht argumentet e tyre në një seancë dëgjimi, nëse e kanë kërkuar këtë gjë në komentet e tyre me shkrim dhe nëse ato janë të interesuara. Komisioni mund t'u japë palëve mundësinë që t'i shprehin pikëpamjet e tyre verbalisht, edhe në raste të tjera kur ai e sheh të nevojshme.
2. Komisioni fton me shkrim palët që do të dëgjohen që të jenë pjesëmarrëse në datat e vendosura për seancën e dëgjimit.
3. Palët e ftuara për të marrë pjesë duhet të paraqiten personalisht ose të përfaqësohen nga përfaqësues i autorizuar. Ndërmarrjet dhe grupet e ndërmarrjeve mund të përfaqësohen edhe nga një person i përbashkët autorizuar.
4. Seancat e dëgjimit, si rregull janë të mbyllura për publikun dhe regjistrohen. Komisioni mund të vendosë për organizimin e seancave të hapura për publikun.
5. Çdo palë mund të dëgjohet veçmas ose në prezencën e palëve të tjera të ftuar për të marrë pjesë, duke mbajtur në konsideratë interesin legjitim të ndërmarrjeve për mbrojtjen e sekreteve të tyre të biznesit dhe informacione të tjera konfidenciale.

Neni 21 **Vendimet për autorizimin e realizimit të përkohshëm të përqendrimit**

1. Në ato raste kur Komisioni mendon të marrë një vendim në bazë të nenit 60 të Ligjit, i cili ka pasoja për një ose më shumë palë, njofton me shkrim palët njoftuese dhe palët e tjera të përfshira, lidhur me vërejtjet e tij dhe cakton një afat kohor brenda së cilit ato mund të japin pretendimet e tyre shkresërisht dhe në seancë dëgjimore.
2. Kur palët njoftuese dhe palët e tjera të interesuara kanë paraqitur pretendimet e tyre, Komisioni merr vendim në lidhje me këtë përqendrim.
3. Në rast të mosparaqitjes së palëve në seancë dëgjimore dhe/ose të mosparaqitjes së pretendimeve të tyre me shkrim brenda afateve të përcaktuara në pikës 1 të këtij neni, Komisioni i njofton me shkrim për vendimin e marrë brenda 5 ditëve nga marrja e këtij vendimi.

Neni 22
Afatet kohore të angazhimeve

1. Angazhimet e propozuara Autoritetit nga palët sipas nenit 56, pika 2 të Ligjit, për të cilat palët mendojnë se mund të shërbejnë si bazë për vendimin duhet të paraqiten pranë Autoritetit jo më vonë se 1 (një) muaj nga data e marrjes së njoftimit.
2. Angazhimet e propozuara Autoritetit nga palët pjesëmarrëse sipas nenit 57, pika 2 të Ligjit, për të cilat palët mendojnë se mund të shërbejnë si bazë për vendimin duhet të paraqiten pranë Autoritetit jo më vonë se 2 (dy) muaj nga data kur ka nisur procedura e thelluar.
3. Përcaktimet e bëra në pikat 1 dhe 2 të këtij neni do të zbatohen në përputhje me këtë Rregullore.

Neni 23
Procedura për angazhimet

1. Një kopje origjinale e angazhimeve të propozuara për Autoritetin nga ndërmarrjet sipas neneve 56, 57 të Ligjit duhet të paraqiten pranë Autoritetit në adresën zyrtare të tij.
2. Çdo palë që propozon angazhime pranë Autoritetit do të identifikojë qartë çdo dokument (apo të dhënë) i cili konsiderohet si konfidencial, të japë arsyet për këtë dhe të sigurojë një version tjetër jo-konfidencial brenda afatit kohor të vendosur nga Autoriteti.

Neni 24
Marrja e vendimeve dhe dëgjimi i palëve

1. Nëse Komisioni mendon të marrë një vendim sipas neni 56, pika 1, u krijon mundësi për tu dëgjuar, palëve njoftuese dhe palëve të tjera të interesuara ose përfaqësuesit e tyre për çështjen në fjalë.
2. Komisioni i paraqet me shkrim vërejtjet e tij palëve njoftuese, palëve të tjera të interesuara ose përfaqësuesve e tyre dhe cakton një afat kohor brenda së cilit ata mund të paraqesin me shkrim pretendimet e tyre.
3. Palëve të cilave iu janë drejtuar vërejtjet e Komisionit ose ato që janë njoftuar për këto vërejtje, brenda afatit kohor të përcaktuar, japin me shkrim pretendimet e tyre si dhe për ti vërtetuar ato, mund të bashkëlidhin çdo dokument të mundshëm. Palët mund t'i propozojnë Komisionit dëgjimin e personave të cilët mund të vërtetojnë këto pretendime.

4. Procedurat e përcaktuara në pikat 2 dhe 3 të këtij neni, zbatohen ndaj palëve sipas përcaktimit të bërë në nenin 19 pika 2 shkronja c, të kësaj rregulloreje.

Neni 25 **Vendimet e Komisionit**

1. Kur Komisioni merr vendim se transaksioni i njoftuar nuk përbën një përqendrim sipas nenit 10 dhe 12 të Ligjit, Autoriteti duhet të njoftojë me shkrim palët njoftuese ose përfaqësuesit e tyre, në përputhje me afatin e përcaktuar në nenin 56 të Ligjit.
2. Kur Komisioni konstaton se përqendrimi i njoftuar nuk krijon ose forcon pozitën dominuese, ai e autorizon atë në zbatim të nenit 56, pika 1 në kuptim të fjalisë së parë të Ligjit.
3. Kur Komisioni konstaton se përqendrimi i njoftuar shfaq shenja të krijimit ose forcimit të pozitës dominuese, në zbatim të nenit 56, pika 1 të Ligjit, në kuptim të fjalisë së dytë, vendos fillimin e procedurave të thelluar të kontrollit të përqendrimit ose autorizimin e përqendrimit me kushte dhe detyrime.
4. Kur Komisioni verën se përqendrimi i ndërmarrjeve është kryer në shkelje të detyrimit për njoftim, vendos me nismën e vet fillimin e procedurave të kontrollit të përqendrimit.

Neni 26 **Publikimi i vendimeve**

Vendimet e Komisionit publikohen në Buletinin Zyrtar si dhe në faqen zyrtare të internetit Autoritetit të Konkurrencës.

KREU V **Dispozita të tjera**

Neni 27 **Dërgimi i dokumenteve**

Dokumentet dhe ftesat nga Autoriteti për tek të adresuarit dërgohen në një nga këto mënyra:

- a. Letër e regjistruar me konfirmimin e marrësit;
- b. Faks me kërkesë për dhënien e konfirmimit nga marrësi;
- c. Postë elektronike me një kërkesë për dhënien e konfirmimit nga marrësi(përqendrime@caa.gov.al).

Neni 28
Vendosja e afateve kohore

1. Në vendosjen e afateve kohore, Autoriteti do të ketë parasysh kohën e nevojshme për përgatitjen e formularëve dhe urgjencën e çështjes.
2. Këto afate kohore do të vendosen mbi bazë kalendarike, duke marrë parasysh ditët e festave zyrtare.

Neni 29
Shfuqizime

Rregullorja “Për zbatimin e procedurave të përqendrimit të ndërmarrjeve:” miratuar me Vendimin nr. 7, datë 1.6.2004 të Komisionit të Konkurrencës shfuqizohet.

Neni 30
Hyrja në fuqi

Kjo Rregullore hyn në fuqi 15 ditë pas miratimit të saj nga Komisioni i Konkurrencës.